

# Biskopimik qinersisarneq pillugu Namminersorlutik Oqartussat nalunaarutaat

Ilageeqarneq pillugu Inatsisartut inatsisaat nr. 9, 19. maj 2010-meersumi § 7, imm. 2 naapertorlugu aalajangersarneqarpoq:

## Kapitali 1

### *Qinersinissamut piffissaq*

§ 1. Kalaallit Nunaanni ilagiinnut biskopissamik allattoqarfimmit inassuteqarnikkut qaqugu qinersisoqarnissaa kiisalu innersuunneqartut nalunaarutiginnissaannut piffissamik killiliineq ilageeqarnermut Naalakkersuisup aalajangerlugulu nalunaarutigisassavaa.

## Kapitali 2

### *Qinersinermi aqutsisut*

§ 2. Qinersinermi aqutsisussanik qinersinermut ataatsimiititaliortoqassaaq.

*Imm. 2.* Qinersinermut Ataatsimiititaliap inuttarissavai Naalakkersuisunut siulittaasup naalakkersuisoqarfiani pisortaq, kommunit ataatsimoorlutik toqqagaat ataaseq kiisalu Inatsisartut Allattoqarfiani allattaaneq taakkuluunniit sinniisaat.

*Imm. 3.* Qinersinermut Ataatsimiititaliap siulittaasua tassaassaaq Naalakkersuisut siulittaasuata naalakkersuisoqarfiani pisortaq.

*Imm. 4.* Qinersinermut Ataatsimiititaliap suliani allattortassavai.

*Imm. 5.* Ilagiit allaffiat qinersinermut ataatsimiititaliamut allatseqarfiussaaq.

§ 3. Qinersinermut Ataatsimiititaliaq qinersinerup piareersarneqarnerani ingerlanneqarneranilu piginnaatitaavoq pissutsit naapertorlugit, matumanilu sila peqqutaatillugu, qinersinermi maleruaqqusanik saneqqutsisinnaanissamut, patsisissaatillugu qinersinerup isertuussassaanerata qinersinerullu ingerlanneqarnerani nakkutigisaanerata tamatigut isumannaarsimanissaat.

## Kapitali 3

### *Qinigaasinnaasut*

§ 4. Biskopimut inuk ataasiinnaq toqqarneqarsinnaavoq:

1) Kalaallit Nunaanni ilagiinni palasitut sulisimasoq sulisorluunniit,

2) kalaallit oqaasiinik ilisimasaqartoq, aamma  
3) upperisarsiornerup tungaatigut ilisimatusarfimmi bacheloritut naammassinnissimasut imaluunniit nunat avannarliit universitetianni upperisarsiornerup tungaatigut kandidatitut soraarummeersimasut kingornatigullu pastoralseminariumimi ilinniarnermik ingerlatsisimasut.

**§ 5.** Biskoppissatut qinigassanngortikkusuttut qinigassanngortinnissamut nalunaarut allattoqarfimmut tunniutereersimassavaat nalunaarutiginninnissamut killiliussaq qaangiutinnginnerani, tamannalu pissaaq § 1 naapertorlugu.

**§ 6.** Qineqqusaarnermut nalunaarut minnerpaamik inunnik 20-nik atsiorneqarsimassaaq annerpaamillu 30-init qinersisinnaasunit innersuunneqassallutik § 8 naapertorlugu. Atsiornerit nalunaarummi namminerimi issinnaapput taassumaluunniit assilinerani issinnaallutik.

*Imm. 2.* Qineqqusaartup atsiornermigut qineqqusaarnini pillugu uppersarsarlugu atsiorsimassaaq.

*Imm. 3.* Qinersisarteq ataaseq qineqqusaartunut arlalinnut innersuussinnaanngilaq.

*Imm. 4.* Nalunaarutiginninnermi ilanngunneqassapput innersuussat ataasiakkaarlugit atii, atsiorneri, inuuii najugaallu.

**§ 7.** Allattoqarfiup qineqqusaartut pillugit nalunaarutit atortussaataanerit pillugu nakkutilliissaaq qineqqusaartullu aqqinik nalunaarutigineqartunik allattuissalluni, taakkulu sapinngisamik piaarnerpaamik qinersinermut ataatsimiititaliamut qineqqusaartut aqqinik tunniussinissamut killiliussap naannginnerani nassiuunneqassallutik, taamaattoq imm. 2 takuuk.

*Imm. 2.* Nalunaaruteqarneq amigaateqarpat qineqqusaartut ullunik marlunnik piffissalerlugit periarfissinneqassapput nalunaarummik aaqqiinissaannut.

*Imm. 3.* Qinersinermut ataatsimiititaliaq qineqqusaartut nalunaarutigineqartut atortusaaq pillugit sapinngisamik piaartumik inaarutaasumik aalajangiissaaq tamannalu allattoqarfimmut nalunaarutigissallugu. Qinigassanngortitap nalunaarutigineqarnerani kukkuneqarsimappat Qinersinermut Ataatsimiititaliap pineqartoq kukkunerup aqqinneqarnissaanut ulluinnarnik marlunnik piffissalissavaa.

*Imm. 4.* Qinigassanngortittut akuerisaasut aqqi ilagiit sinniisaasa siulittaasuinut tamanut allattoqarfik piaartumik nalunaaruteqassaaq.

## **Kapitali 4**

### *Qinersisinnaatitaasut*

**§ 8.** Biskopimik qinersinermi qinersisinnaatitaapput biskopeqarfimmi ilagiit sinniisaat kiisalu palasit kiffartortut, matumanittaaq palasiugallartut aamma palasit qinersinerup nalaani palasiunerminnit sulinnigiffeqarallartut.

**§ 9.** Allattoqarfiup qinersisinnaatitaasut akuerisaasut nalunaarsimasut qinersinermut allattorsimaffiat suliarissavaa. Qinersinermut allattorsimaffik qineqqusaartut nalunaarutiginnissaannut killiliussap qaangiutinnginnerani suliarereerneqarsimassaaq, tak § 1.

*Imm. 2.* Qinersinissamut allattorsimaffimmi ilaatinneqassapput qinersisinnaatitaasut aqqi, inuuii najugaallu qinersisinnaatitaasullu tamarmik immikkut normumik (qinersinermi normumik)

tunineqassapput.

*Imm. 3.* Kinaluunniit qinersisussat allassimaffiannut ilanngunneqarsimatinnani qinersisinnaatitaanngilaq.

## **Kapitali 5**

### *Qinersinermut piareersaanerit*

**§ 10.** Qinersinermut ataatsimiititaliap allattoqarfiata qinersinissamut atortussat suliarissavai kiisalu ilagiit sinniisaasa siulittaasuannut nassiutissallugit.

## **Kapitali 6**

### *Qinersinermik naammassinninneq*

**§ 11.** Ilagiit sinniisaata siulittaasuata taassumalluunnit sinniisaata nakkutigissavaa allakkat puussaat tiguneqartut naammannersut kiisalu qinersinissamut allattorsimaffik ilagiit sinniisaannut qinersisinnaasut aqqi tamarmik piffimmiittut ilanngullugit.

**§ 12.** Ilagiit sinniisaata siulittaasuata taassumalluunnit sinniisaata piffissaq aalajangissavaa ilagiillu sinniisaannik ataatsimiigiaqqusissalluni.

*Imm. 2.* Ataatsimiinnermut ilagiinni qinersisinnaatitaasut tamarmik qaaqquneqassapput, matumani ilaallutik palasit, provstit biskopilu.

*Imm. 3.* Ataatsimiinnermut qinersisinnaatitaasut taamaallaat peqataasinnaapput.

**§ 13.** Ataatsimiinnermi ilagiit sinniisaata siulittaasuata qineqqusaartut aqqi ilisimatitsissutigissavai.

*Imm. 2.* Ilagiit sinniisaata siulittaasuata allakkat puussai qinersisinnaatitaasunut tunniutissavai qinersisinnaatitaasullu tunineqartup aqqata saniatigut krydsilissallugu.

*Imm. 3.* Qinersineq pissaaq immikkut qinersinermut allagartaq atorlugu tassanilu kalaallisut qallunaatullu allaqqassalluni "biskopimut qinersineq".

*Imm. 4.* Qinersisup qinersinermut allagartaq immersussavaa qinikkami aqqa allallugu. Taassuma kingorna qinersisup qinersinermut allagartaq allakkap puuanut ilanngunneqarsimasumut ikissavaa ilagiillu sinniisaata siulittaasuannut tunniullugu.

*Imm. 5.* Qinersineq naammassineqariartoq ilagiit sinniisaata siulittaasuata imm. 4-mi taaneqartut kiisalu qinersinermi atortut atorineqanngitsoortut ataatsimoortillugit allakkat puuinut ilissavai. Allakkat puuat taanna kiisalu qinersinermut allattorsimaffik ilanngullugu siulittaasup kingusinnerpaamik ullup tulliani allattoqarfimmut nassiutissavai.

**§ 14.** Qinersisup qinersisimasup kina qinersimanerlugu paasissutissiissutigisussaatitaanngilaa.

## **Kapitali 7**

### *Qinersinermik naatsorsuineq*

**§ 15.** Pappiaraq taasivik taasivigineqarsimasooq atorsinnaanngilaq:

1) aqqit arlallit qinerneqarsimappata.

- 2) qulakkeerlugu aalajangerneqarsinnaanngippat, qinigassanngortittunit sorleq qinersisartumit qinerusunneqarsimansoq,
- 3) qinersinermi allakkap puussaa matoqqasoq arlalinnik taasissutiniq imaqarpat imaluunniit
- 4) taasissut unioqqutitsinikkut pilersinneqarsimasutut ilimagineqarpat.

**§ 16.** Allattoqarfiup qinersineq naatsorsussavaa.

*Imm. 2.* Taasinernik kisitsineq tamanut ammasuuvoq. Inunnik qinersisinnaatitaasunik ikinnerpaamik marlunnik qinersinermi taasinerup kisinneqarnerani tamanut ammasuusumi najuuttoqanngippat, qinersisinnaasut akornanni inunnik marlunnik qinersisinnaatitaasunik uppersaasussatut najuuttussanik aggersaasoqassaaq.

**§ 17.** Qinersineq amerlanerussuteqarnikkut aalajangerneqassaaq.

*Imm. 2.* Qineqqusaartut marluk amerlaqatigiinnik qinerneqarsimappata makitsinikkut aalajangiisoqassaaq.

**§ 18.** Qinersinerup inernera pigineqarsimalerpat allattoqarfiup tamanna pillugu qinersinermut ataatsimiititaliamut nalunaarutigissavaa.

*Imm. 2.* Qinersinermut ataatsimiititaliap inernerit akuersissutigissavai llageeqarnermullu Naalakkersuisoqarfimmut qineqqusaartut inernerit ilanngullugit tamatuminnga nalunaaruteqassalluni.

*Imm. 3.* Qinersinerup inernera llageeqarnermut Naalakkersuisoqarfimmit tamanut saqqummiunneqassaaq.

## **Kapitali 8**

*Atortuulersitsinissamik atorunnaarsitsinissamillu aalajangersagaq*

**§ 19.** Nalunaarut ulloq 1. januar 2020-mi atuutilissaaq.

*Imm. 2.* Biskopimik qinersineq pillugu Namminersornerullutik Oqartussat nalunaarutaanni nr. 5-imi, 16. februar 1995-imeersoq aamma atorunnaarpoq.

*Namminersorlutik Oqartussat, ulloq 16. december 2019*

Ane Lone Bagger

/

Lone Nukaaraq Møller

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut